

## **ORDENANZA REGULADORA DA TAXA POR ASISTENCIA E ESTANCIA EN GARDERÍAS INFANTÍS**

### **Artigo 1º. NATUREZA E FUNDAMENTO**

No uso das facultades concedidas polos artigos 133.2 e 142 da Constitución, polo artigo 106 da Lei 7/1985 de 2 de abril, Reguladora das Bases de Réxime Local e os artigos 20 e 58 da Lei 39/1988, de 28 de decembro, e de conformidade co disposto nos artigos 15 a 19 da Lei 39/1988, de 28 de decembro, acorda a imposición e ordenación da Taxa por asistencia e estancia en fogares e residencias de anciáns, garderías infantís, albergues e outros establecementos de natureza análoga.

### **Artigo 2º. FEITO IMPOÑIBLE**

Constitúe o feito imponible da taxa a prestación dos servizos por asistencia e estancia en fogares e residencias de anciáns, garderías infantís, albergues e outros establecementos de natureza análoga.

### **Artigo 3º. SUXEITOS PASIVOS**

Serán suxeitos pasivos desta taxa as persoas físicas ou xurídicas e as entidades ás que se refire o artigo 33 da Lei Xeral Tributaria que soliciten ou resulten beneficiadas ou afectadas polos servizos ou actividades que se detallan na tarifa desta taxa.

**Artigo 4º. RESPONSABLES**

Serán responsables solidarios das obrigas tributarias dos suxeitos pasivos as persoas físicas ou xurídicas ás que se refiren os artigos 38.1 e 39 da Lei Xeral Tributaria.

Serán responsables subsidiarios os administradores das sociedades e os síndicos, interventores ou liquidadores de quebras, concursos, sociedades e entidades en xeral, nos supostos e co alcance que sinala o artigo 40 da Lei Xeral Tributaria.

**Artigo 5º. COTA TRIBUTARIA**

<b>CONCEPTO</b>	<b>PREZO</b>	
<u>Atención educativa</u>	Xornada completa (6-8 horas)	<b>160 €/mes</b>
	Media xornada (4 horas)	<b>80 €/mes</b>
<u>Comedor</u>	Mes	<b>70 €</b>
	Días soltos	<b>4 €/día</b>
<u>Horas extraordinarias</u>		<b>20 €/hora/mes</b>

**Artigo 6º. BENEFICIOS FISCAIS**

Só se admitirán os beneficios que veñan establecidos nas normas con rango de Lei ou deriven de tratados ou acordos internacionais, non obstante e en virtude do disposto no artigo 24.4 do Real Decreto Lexislativo 2/2004, do 5 de marzo, polo que se aproba o texto Refundido da Lei Reguladora das Facendas Locais (Lei 39/1988, do 28 de decembro), que literalmente di:

## ARTÍGO 24. COTA TRIBUTARIA

1. O importe das taxas previstas pola utilización privativa ou o aproveitamento especial do dominio público local fixarase de acordo coas seguintes regras:

4. Para a determinación da cuantía das taxas poderán terse en conta criterios xenéricos de capacidade económica dos suxeitos obrigados a satisfacelas.

### ESTABLÉCENSE OS SEGUINTES BENEFICIOS FISCAIS, RELACIONADOS COA CAPACIDADE ECONÓMICA DOS OBRIGADOS TRIBUTARIOS:

#### 1º BONIFICACIÓNS POR NIVEL DE RENDA FAMILIAR

Segundo a renda per cápita mensual da unidade familiar, sobre os prezos sinalados aplicaranse as reducións que se especifican a continuación a excepción dos prezos de comedor por días soltos e das horas extraordinarias que non estarán suxeitos a ningunha redución:

TRAMOS RENDA PER CÁPITA DA UNIDADE FAMILIAR	XORNADA COMPLETA	MEDIA XORNADA	COMEDOR
Inferior ao 30 % do IPREM	0,00 €	0,00 €	0,00 €
Entre o 30 % do IPREM e inferiores ao 50 %	0,00 €	0,00 €	16,50 €
Entre o 50% do IPREM e inferiores ao 75%	33,00 €	16,50 €	16,50 €

Entre o 75% do IPREM e inferiores ao 100%	66,00 €	33,00 €	25,00 €
Entre o 100% do IPREM e inferiores ao 125%	106,00 €	53,00 €	35,00 €
Entre o 125% do IPREM e inferiores ao 150%	126,00 €	63,00 €	50,00 €
Entre o 150% do IPREM e o 200%	139,00 €	69,50 €	60,00 €
Superiores ao 200 % do IPREM	160,00 €	80,00 €	70,00 €

A renda per cápita mensual da unidade familiar computarase segundo as seguintes regras:

a) Entenderase por unidade familiar a formada polos cónxuxes non separados legalmente e:

— Os/as fillos/as menores, con excepción dos que, con consentimento dos/as pais/nais, vivan independentes destes/as.

— Os/as fillos/as maiores de idade incapacitados xudicialmente suxeitos á patria potestade prorrogada ou rehabilitada.

— Os/as fillos/as maiores de dezoito anos discapacitados cun grao de discapacidade superior ao 33 por cento.

— A determinación dos membros da unidade familiar realizarase atendendo á situación existente no 31 de decembro do ano anterior a aceptación da praza.

b) Tomarase o importe dos ingresos totais da unidade familiar, que será o resultado da agregación das rendas do exercicio anterior a aquel en que dea comezo o curso escolar, no cal se pretenda que produza efectos, de cada un dos membros da unidade familiar, calculadas por agregación da base imponible xeral coa base imponible do aforro, calculadas segundo os criterios establecidos na normativa do IRPF.

O importe dos ingresos totais da unidade familiar será acreditado, mediante a presentación das copias certificadas pola administración tributaria das declaracións do IRPF ou a certificación de ingresos das persoas que non presentasen as declaracións do IRPF.

c) O importe anterior dividirase polo número de membros computables da unidade familiar. No caso de familias monoparentais, incrementarase nun 0,8 o número real de membros que compoñen a unidade familiar. entenderase por familia monoparental a unidade familiar á que se refire o punto 4.2.a) cando formase parte dela un único proxenitor ou proxenitora que non conviva con outra persoa con que manteña unha relación análoga á conxugal e sempre que o outro proxenitor ou proxenitora non contribúa economicamente ao seu sustento.

d) A renda per cápita mensual será o resultado de dividir o importe anterior por doce.

## **2º BONIFICACIÓNS POR FAMILIA NUMEROSA**

Segundo as circunstancias da unidade familiar, sobre o prezo que resulte de aplicar o disposto no punto anterior, aplicaranse os seguintes descontos que non son acumulables entre si:

- Nenos/as pertencentes a familias numerosas: desconto dun 20 %.
- Nenos/as pertencentes a familias monoparentais: desconto dun 20 %.
- Cando asistan á mesma escola varios irmáns, o segundo e sucesivos terán un desconto dun 20 %.

#### Artigo 7º. **DEVENGO**

Devéngase a taxa e nace a obriga de contribuír cando se presente a solicitude de prestación do servizo ou actividade.

#### Artigo 8º. **LIQUIDACIÓN**

Cando se trate de servizos ou actividades cunha liquidación que se poida cuantificar, no momento de presentar a solicitude de prestación para o primeiro período de liquidación. Nos sucesivos liquidarase ao inicio de cada período de liquidación, en calidade de depósito previo (os períodos de liquidación veñen establecidos nas tarifas desta taxa: día, meses, curso académico, etc.)

Cando se trate de servizos ou actividades cunha liquidación que non se poida cuantificar no momento de presentar a solicitude da prestación do servizo ou da realización da actividade, practicarase a liquidación unha vez prestado o servizo ou realizada a actividade, en cada un dos períodos de liquidación (días, meses, curso, etc. consonte ao disposto na tarifa da taxa).

Se se realiza a prestación do servizo ou a actividade sen mediar solicitude, liquidarase e notificarase a taxa tan axiña como se detecte esta situación, esixíndose o ingreso nos prazos previstos no Regulamento Xeral de Recadación para a liquidación de contraído previo, sen prexuízo de abrir o oportuno expediente sancionador por infracción tributaria.

Cando por circunstancias sobrevidas (solicitude fóra de prazo, traslado de residencia, etc.), o/a neno/a ingrese na escola con posterioridade ao día 15 do mes, a cota que corresponda pagar polo dito mes terá un desconto do 50 %.

## **SUSPENSIÓN TEMPORAL DA COTA**

1. Os pais, nais ou representantes legais non terán a obriga de aboar a cota correspondente á atención educativa e ao servizo de comedor durante os seguintes períodos:

- O mes de vacacións anual da/o nena/o.
- Cando por calquera motivo a escola permaneza pechado por un período superior a quince días naturais.

En ambos os dous casos a suspensión realizarase de oficio. A suspensión do pago polo mes de vacacións farase unha vez que o neno/a teña disfrutado todo o período de vacacións e producirá efectos na mensualidade posterior ao remate das mesmas.

2. Os pais, nais ou representantes legais non terán a obriga de aboar a cota correspondente ao servizo de comedor cando por causa debidamente xustificada a/o nena/o deixe de asistir temporalmente ao centro. Neste caso, a suspensión da cota terá lugar desde o primeiro día do mes natural seguinte á data de inasistencia ao centro e durará ata o día primeiro do mes natural en que teña lugar a reincorporación da/o nena/o ao centro.

Non obstante, se a reincorporación se produce con posterioridade ao día 15 do mes, a cota do comedor correspondente ao dito mes reducirase nun 50%.

A solicitude de suspensión da cota correspondente a este servizo, xunto coa acreditación documental da circunstancia que a motiva, deberá presentarse nos rexistros do Concello de Sanxenxo e será aprobada ou desestimada por resolución de alcaldía previo informe da dirección do centro.

Nos casos de suspensión temporal da cota correspondente ao servizo de comedor, o pagamento correspondente ao mes de reincorporación realizarase no prazo dos dez días naturais seguintes á data de reincorporación. Así mesmo, nos casos en que o/a concelleiro/a acorde a non procedencia da suspensión solicitada, o suxeito obrigado deberá ingresar as cotas atrasadas no prazo dos dez días naturais seguintes á notificación do acordo denegatorio.

3. Salvo o disposto nos dous puntos anteriores, a falta de asistencia do neno/a non supón redución nin suspensión da cota mentres non se formalice a baixa correspondente.

#### Artigo 9º. **INGRESO**

O pagamento desta taxa realizarase:

- Cando se trate de liquidacións cunha cuantificación que se poida efectuar antes de prestar o servizo ou de levar a cabo a actividade, realizarase o ingreso antes da prestación do servizo ou da realización da actividade na Tesourería Municipal ou nas entidades financeiras que sinalen na liquidación, antes do día 10 de cada mes.
- Cando se trate da liquidacións cunha cuantificación que non se poida efectuar con anterioridade á prestación do servizo ou á realización da actividade, farase o ingreso nos prazos e lugares que se sinalen na liquidación.



## Artigo 10º. **INFRACCIÓNS E SANCÍONS**

Nesta materia estarase ao disposto na Lei Xeral Tributaria e na normativa de desenvolvemento.

### **DISPOSICIÓN ADICIONAL ÚNICA**

Cando existan os convenios de colaboración aos que fai referencia o artigo 27.2 da Lei 39/1988, de 28 de decembro, os procedementos de liquidación e recadación regulados nos artigos 8 e 9 desta ordenanza cederán ante a regulación prevista nos convenios.

### **DISPOSICIÓN FINAL**

A presente Ordenanza fiscal, cunha redacción definitiva aprobada polo Pleno da Corporación, en sesión celebrada na data 21-12-2012, entrará en vigor ao día seguinte da súa publicación no Boletín Oficial da Provincia (Núm. 41 con data 27 de febreiro de 2013) permanecendo en vigor ata a súa modificación ou derogación expresa.